

I preves de Glesie Furlane amiré te Fascia

L film "Missus" de Massimo Garlatti-Costa é stat portà a Soraga per endrez de l'Union di Ladins e de l'Istitut Cultural, soscedan gran amirazion e emozion. L'é na batalia per duta la mendranzes

Mendranzes - L'é ruà a Soraga en sabeda ai 11 de november l film "Missus", che moscia la batalia di preves de Glesie Furlane per poder ofiziar la messa te la "marilenghe".

L'ocajion de vegnir prejentà ence tel raion ladin é stata sporta dal secretèr de Glesie Furlane Christian Romanini tel chèder del "Missus Tour", che da chest istà l'ha portà l film te comunanzes de mendranza de duta la Tèlia, pean via dal Sud. So envit é stat tout sù da l'Union di Ladins e da l'Istitut Cultural de Fascia, de gra a la colaborazion del Comun de Soraga, rapresentà chela sera dal vizeombolt Valerio Pederiva, che à portà so salut.

L publich ruà te La Gran Ciasa à vardà con atenzion e emozion l bel docufilm de Massimo Garlatti-Costa. La testimonianzes de chisc 5 preves, duc oramai inant coi egn, che con calma e serenità, ma tel medemo temp con gran forza e determinazion, i conta sia batalia per veder recognosciù da Roma l derit de dir messa te sia mèrelenga, à lascià l segn tel publich.

Dò l Conzìl, che l'ha dat l met de passèr dal latin ai lengac vives - conta Pre 'Sef - duc i é passè al talian, ma nosc lengaz l'é l furlan, perché cognone mudar te chela che ruon te gejia, e no podone seghitar a rejonar descheche fajon semper?

Te la paroles de ogneun de chisc preves se sent la fè e la convinzion fona, che l'é l prim pont de forza del film. A chest se jonta na fotografia dalbon n muie bela, che met al luster ence i valores de èrt e de ambient de la Ciarnia e del Friul, con ciantogn desmenté e gejias da marevea.

E dapò l'é la musega, dassen maraveusa, e la cianties che enterza duta la testimonianzes e che met al



I esponenti de l'Union di Ladins e de l'Istitut Cultural de Fascia a Soraga per la proiezion del film Missus, con i regist Massimo Garlatti-Costa e Christian Romanini.

luster l gran e veior patrimoni storich e liturgich tradizionèl del Patriarcato de Aquileia.

La batalia de chisc preves che seghita a portèr inant la zelebrazions per furlan, eneben che oramai i sie pec, veies e isolé, é sostegnuda da dut l moviment "Glesie Furlane", na sociazion culturala che tol ite ence laiches e che chier de jir ite a fon te sia reijes cristianes e religioses, e la é fondamentala percheche la mèrelenga seghite a restèr n lengaz vif. "L'é semper stat i preves a tegnir sù l furlan" à dit tel debatit a Soraga a la fin del film l regist Massimo Garlatti-Costa e l giornalista e secretèr de Glesie Furlane Christian Romanini.

L professor Cesare Bernard, che se à dat jù trop per portèr inant la liturgia per ladin te Fascia, l se n'ha fat marevea che, eneben che tel Friul i

aesse jà traslatà duta la Bibia e l Lezionarie, che i à abù ence l'aproazion da Roma, i aesse amò problemes a fèr zelebrazions per so lengaz. "L'é stat fat ence l Messal, e manà al Vatican per l'aproazion amò del 2006 - à responet i referenc furlegn - ma l'autorizazion no la é mai ruèda."

L publich, anter chisc l president de l'Union di Ladins de Fascia Fernando Brunel, la presidenta de l'Union Generela di Ladins dila Dolomites Miha Mussner, l president e l diretor de l'Istitut Cultural Ladin, Antone Pollam e Fabio Chiochetti, à abù paroles de gran lauda per chest film, che de segur no l desc demò n chèder "local" sul Friul, ma l porta n messaje de emportanza universal per duc i picoi popoi e i picoi lengac, e i à palesà la speranza che l posse amò vegnir prejentà te noscia region.



Endèna l Missus Tour va inant tel Piemont e te la Sardegna, e dapò de december, tel temp de l'Avent che l'é apontin canche vegn zebrà l tradizionèl "Missus", rit veior de la Gejia furlana, l ruarà "a ciasa": l prim de december l vegnarà moscià da les

9 da sera tel chèder del festival Suns Europe a Udin e ai 10 de december l ruarà tel maraveous dom de Vencion (Venezia), lech simbol de la ricostruzion del teremot del 1976 e de Glesie Furlane.

Lucia Gross

